

La litiero di Leono, da Ronald Bijtenhoorn

Uldie Leono parolis kun sua amiki Hundo, Simio e Foxo.

"Dicez a me, kara amiki, quale odoras mea litiero?" dicis Leono.

"Leono," dicis Hundo, "tu esas bona amiko e me ne timas tu. Tua litiero tre malodoras."

Leono iraceskis: "Tu ne esas mea bona amiko! Quale tu povas dicar ke mea litiero tre malodoras? Forirez e ne revenez od altre me manjos tu!"

"Quala folo!" dicis Simio, "Me esas tua amiko, Rejo Leono! E me dicas a tu ke tua litiero bonodoras quale parfumoza flori."

Leono itere iraceskis: "Tu mala Simio! Anke tu esas folo! Forirez e ne revenez od altre me manjos tu!"

Pose Leono turnis su a Foxo e questionis: "E quon tu opinionas? Quale odoras mea litiero?"

"Desfortunoze, kara Leono," dicis Foxo, "Me dezirus ma ne povas dicar. Me kaptesas da kataro e do flaras nulo."

Leono rideskis e dicis: "Tu esas tre saja, mea amiko. Tu salvis mea fiereso e tua propra pelo."

P.S. da B. Y. Takata:

Komprenebele Nasreddin-falkono flug-falis de l'alta cielo avan la lenono:

"Bon jorno! Me nomesas Nasreddin, la hucpoza* falkono."

La lenono perplexa ma respondis a la hucpoza* falkono:

"Pro quo vu tante rapide flug-falis de la tante alta cielo avan me?"

Nasreddin lore dicis kandidate a la leono havanta kelka desquieteso:

"Me havas akutega oreli ed okuli' ed en la cielo audis via konversado."

"Pro quo vu povas esar kontenta kun tante infantala agnostikismo?"

La leono itere multe iraceskis e klamis:

"Pro ke me esas rejo dil tota animala e devas salvar mea kara vizajo."

Lore Nasreddin ridegis e dicis a la leono poke insultita, e riflugis:

"Ne nur vua litiero, ma plu importante, anke vua vizajo tre malodoras."

"Kande do vu sucesos lavabar vua kordio, lavesos vua litiero e vizajo."